



Vischnaunca Lumnezia

| Palius 32D, CH-7144 Vella | +41 (0)81 920 60 00 | info@lumnezia.ch | www.lumnezia.ch |

PROTOCOL RADUNONZA COMUNALA LUMNEZIA
25 D'AVREL 2025

2025/01

25 D'AVREL 2025
CANZLIA COMUNALA, 7144 VELLA
Palius 32D, 7144 Vella

Tractandas

1. Avertura	3
2. Presentaziun ed informaziun davart il project “Valurisaziun dil parcadi Zignaus” (parcadi dallas pendicularas) a Vella	3
3. Protocol dalla radunonza communal dils 13 da december 2024 (2024/04).....	4
4. Approbaziun dalla revisiun parciala dil Reglament da salarisaziun per la suprastanza communal	4
5. Sanaziun dalla Via Resgia a Vattiz.....	5
a) Approbaziun dil project.....	5
b) Concession dil credit da CHF 295'000	5
6. Sanaziun dils stabiliments dall'Alp Sezner el vischinadi da Vignogn.....	6
a) Approbaziun dil project.....	6
b) Concessiun dil credit da CHF 880'000	6
7. Sanaziun dalla Via d'uaul La Ritta a Tersnaus el vischinadi da Suraua.....	8
a) Approbaziun dil project.....	8
b) Concessiun dil credit da CHF 1'800'000	8
8. Cumpra dall'immobiglia nr. 6-108, parcella 4325 Davos Caplan a Vella.....	11
a) Decisiun davart la cumpra.....	11
b) Concessiun dil credit da CHF 1'350'000 per mauns dalla votaziun all'urna	11
9. Varia	14

Protocol dalla radunonza communal Lumnezia (2025/01)

Datum: Venderdis, ils 25 d'avrel 2025
 Liug: Halla plurivalenta dalla casa da scola Sutvitg 28E, 7144 Vella
 Cuoz: 20:00 – 22:30 uras
 Presents: 126 votantas e votants e 4 hosps
 Parsura: Daniel Solèr, president communal
 Actuara: Anina Camenisch, actuara substituta

Tractandas

1. Avertura

Il president communal Daniel Solèr arva la radunonza communal fagend beinvegni als presents ed engrazia ad els d'haver dau suatientscha agl invit.

Gian Fanzun ed Orlando Menghini dalla Cumissiun d'intress valurisaziun dil parcadi Zignaus vegnan beneventai sco hosps. Medemamein fa il presdient communal in beinvegni a dus representats dallas medias romontschas, Reto Pfister dalla RTR ed Augustin Beeli dalla FMR.

Il president communal constatescha, che la radunonza communal ei vegnida convocada ad uras conform allas determinaziuns digl artechel 44 ella constituziun dalla vischnaunca Lumnezia, aschia che la radunonza ei cumpetenta da prender conclus.

Seschau perstgisar han:

- Marcus Caduff, cusseglier guvernativ
- Silvana Caviezel, Vella (canzlista communal)
- Selina Crivelli, Vattiz (menadra finanzas/persunal)

La radunonza elegia dus dumbravuschs

- Marco Sgier, Vella
- Gian Peider Casanova, Vella

2. Presentaziun ed informaziun davart il project “Valurisaziun dil parcadi Zignaus” (parcadi dallas pendicularas) a Vella

Gian Fanzun ed Orlando Menghini presentan il project alla radunonza communal.

Il president communal, Daniel Solèr fa aunc entschinas explicaziuns tier il project numnau ord vesta dalla vischnaunca Lumnezia.

Kurt Soller, Vella fa la damonda davart las investiziuns spitgadas, tgei ein ils cuosts totals che spetgen tier aschin project. Tgei schabegia sch'il project vegn buca realisaus?

Gian Fanzun, Cuera rispunda ch'ei seigi aunc buca vegniu fatg in quen d'investiziun. Tier in project en tala dimensiun stoins quintar cun cuost da radund CHF 45 milliuns.

Mario Derungs, Vella explichescha ch'il project seigi segir ina caussa positiva en caussa dil parcadi. Il niev baghetg para da vegnir medem aults sco il Hotel Pellas. El damonda sch'ei vegni buca priu risguard sin ils habitonts dil vitg. Cun tals objects avon casa vegni la survesta restrenschiada ed ins sesenti stretgani. Las casas che sesanflan entuorn il niev baghetg han aschia buca pli sulegl.

Gian Fanzun rispunda ch'ei vegni mo fatg quei, ch'ei tenor plan da zonas lubiu. Cheu datti neginas excepziuns.

Ord la radunonza vegn tschenta la damonda davart il proxim pass ed en tgei temps ch'ins sa quintar cun l'entschatta dil project. Vinavon vegn duamndau sch'uniuns d'ambient ein vegnir tratgas tier.

Gian Fanzun explichescha ch'il proxim pass ei la revisiun totala dalla planisaziun locala. Gliez drova cun l'approbaziun da tut ils gremis rodund 1 ½ onns. Entochen lu sa il project buca vegnir continuaus. Uniuns d'ambient ein aunc buca vegnir involvai. El visescha vi ch'encunter

la revisiun totala dalla planisaziun locala sa mintgin fa protesta. La cuminonza d'intress vegni segir ad informar talas uniuns davart il project.

Pascal Casanova, Lumbrein dir ch'il project para d'esser empau surdimensiunaus, era en vesta sco la Val svilupescha turisticamein. Ein cheutier vegnir fatg patratgs?

Gian Fanzun explichescha ch'ei drova ina tala dimensiun per saver ir sil marcau. El fa ils exempels cun Mustér e Sedrun. Tier ina commercialisaziun internaziunala drovi ina certa dimensiun, schiglioc dat ei negins investurs. Quei hai era semussau ad Andermatt, cheu hagi negin saviu s'imaginar ch'ei vegni puspei asch'ina attracziun. Ei semuossa era ella historia, ch'ils gronds survivan.

Pascal Casanova spera che Lumnezia vegni buca cumparegliau cun Andermatt. Concorde quei ella Val? Ils indigens vegnan spuentai, sco vegnan ins sin in tal grond project?

Gian Fanzun rispunda che la grondezia ch'ei ussa previda ei il minimun pusseivel per saver garantir ina rentabilitad. Il project ei cumpatibels cun las structuraz localas. Il project ha ina structura da formaziun resp. architectonica sco la casa da vegls Da Casa, aschia datti gia semegliants objects da quellas dimensiuns a Vella.

3. Protocol dalla radunonza communal dils 13 da december 2024 (2024/04)

Il protocol dalla radunonza communal dils 13 da december 2024 ei staus exponius naven dils 03 da schaner 2025 ella canzlia communal e silla pagina d'internet dalla vischnaunca, pia duront silmeins 30 gis.

Tenor art. 34 constituziun vegn il protocol dalla radunonza communal exponius per investa dils votants sil pli tard in meins suenter la radunonza duront 30 dis en casa communal e silla pagina d'internet dalla vischnaunca cun corrispundenta publicaziun. Recuors ein d'inoltrar en scret duront quei temps dall'exposiziun alla suprastanza communal. Ils recuors vegnan tractai alla proxima radunonza communal. Decisiva ei aschia la publicaziun silla pagina d'internet dalla vischnaunca (cun corrispundenta publicaziun).

Il president communal Daniel Solèr constatescha, ch'igl ei buca vegniu inoltrau recuors en scret aschia ch'il protocol dalla radunonza communal dils 13 da december 2024 (2024/04) vala sco approbaus tenor art. 34 dalla constituziun dalla vischnaunca Lumnezia.

4. Approbaziun dalla revisiun parciala dil Reglament da salarisaziun per la suprastanza communal

Introducziun

- a) Sebasond sin art. 42 lit. e dalla Constituziun dalla Vischnaunca Lumnezia duei il reglament da salarisaziun art. 8 al. 1 vegnius adattaus suandontamein.

Artechel actual el Reglament da salarisaziun

Ils ulteriurs commembers da suprastanza obtegnan in'indemnisaziun pauschala da CHF 7'500 ad onn per sesidas da suprastanza, radunonzas communalas e la preparaziun da talas sco era per l'administraziun dil departament.

Il president dalla cumissiun da gestiun dalla vischnaunca Lumnezia, Ciril presenta la tractanda alla radunonza communal.

Dapli lavur per mintga suprastont muort munconza da commembers per la suprastanza communal.

Proposta cun nova formulaziun

Ils ulteriurs commembers da suprastanza obtegnan in'indemnisaziun pauschala da CHF 12'000 ad onn per sesidas da suprastanza, radunonzas communalas e la preparaziun da talas sco era per l'administraziun dil departament.

L'indemnisaziun dalla suprastanza communal tenor art. 8 al. 1, duei ir en vigor retroactivamein per igl 01. da schaner 2025.

Conclus

La radunonza communal decide cun gronda maioritad, senza cuntervusch e cun duas abstenziuns d'approbar la revisiun parziala dil reglament da salarisaziun per la suprastonza communal.

5. Sanaziun dalla Via Resgia a Vattiz

a) Approbaziun dil project

b) Concession dil credit da CHF 295'000

Introducziun

Il schef da departament per traffic, ovras publicas ed ambient, Erwin Capeder presenta il project alla radunonza communal.

- 1) Ei vegn a dar ina nova scrivaria a Resgia, Vattiz. Pils transports cun material e maschinas che la scrivaria drova, sto la via vegnir sanada.
- 2) La lingia da meteor ed aua tschuffa stueva vegnir disslocada. Aschia ha la vischnaunca cumprau ina part da terren da ca. 50 m².
- 3) La survesta da cuosts vegn presentada cun las singulas posiziuns. La suprastonza communal ha decidu d'instradar la procedura da perimeter cun in'intressenza publica da 45%.





Proposta

Approbar il project per la sanaziun dalla Via Rsgia a Vattiz e conceder il credit da CHF 295'000.

Consideraziuns

Gionin Caduff, Degen menziunescha ch'ei seigi impurtont da prender giu avunda dil cantun, schiglioc seigi buca pusseivel da fa la storta.

Il cau da departament, Erwin Capeder explichescha ch'il radius necessari per saver fa la storta segi risguardaus.

Conclus

La radunonza communal decida unanimamein d'approbar e da conceder il credit da CHF 295'000 per la sanaziun dalla Via Resgia a Vattiz.

6. Sanaziun dils stabiliments dall'Alp Sezner el vischinadi da Vignogn

a) Approbaziun dil project


b) Concessiun dil credit da CHF 880'000


Introducziun

- 1) La vischnaunca ei en possess da differentas alps. Il schef da departament d'agricultura, Martin Sgier fa ina cuorta resumaziun dallas alps da mulscher.
- 2) 2020 ei dil Plantahof vegniu la supplicha da fa in pareri en tgei stan las alps sesanflan. La stalla dall'Alp Sezner muossa ils pli gronds basegns, aschia sedatan cheu era ils pli aults cuosts.
- 3) Informaziuns davart l'Alp Sezner:
160 hectaras dall'alp, 13 cargonds, varga 100 vaccas indigenas, 80'000 liters latg ad onn, il caschiel vegn perpart vendius directamein sill'alp.
- 4) Aschia fa Martin Sgier la conclusiun che l'investiziun vegn fatg pils indigens. Vid ils stabiliments dall'Alp Sezner ein adina puspei vegniu fatg pintgas remaduras.
- 5) Ils tscheins per las alps vegn quintaus cun l'unitad da norma da cargada (NST), quels daners tonschan sigl entir intschess dalla vischnaunca Lumnezia per far manteniments, denton buca per investiziuns pli grondas.
- 6) Il davos unviern ha ei dau in'emprova cun in carr da tualettas, muort munconza d'isolaziun ei l'aua denton schelada. Sin fundament da gliez ei previu da baghegiar ina tualetta publica. Cheu ei vegniu fatg la cumperegliaziun cun la tualetta a Parvalsauns,

Vrin per la dimensiun da cuosts. Il liug dalla tualetta vegn midaus, aschia san ils cuosts per la colligiaziun cun la serenera pintga vegnir sminuai. Per la tualetta ei aunc negina lubientscha avon mauns.

- 7) Il stan da mulscher sto entochen 2026 vegnir sanaus, actualmein vegnan las prescribziuns buca tenidas en. Las adattaziuns vid il objet fan ora la gronda part dalla summa.
- 8) Las survestas da cuosts vegnan presentai, pil project survegn la vischnaunca ina contribuziun da CHF 20'000 dil cantun.
- 9) Il pagament dalla Confederaziun per indrezs photovoltaics vegnan adina pli paucs. Actualas cefras san muort gliez buca vegnir muossadas oz. Igl implant photovoltaic ei previu il 2026, pér cu tut las lavurs ein exequidas.





Proposta

Approbar il project per la sanaziun dils stabiliments dall'Alp Sezner e conceder il credit da CHF 880'000.

Damondas

Marco Sgier, Vella: Cun igl impont fotovoltaic vegn produziun energie solara. Vegn il surpli spigintau en ella reit publica?

Martin Sgier, schef dil departament d'agricultura rispunda ch'il trafo ei avon mauns, ina spigintaziun ella reit ei entochen 50kW pusseivel cun il trafo existent.

Conclus

La radunonza communal decida cun gronda maioritad, senza cuntervuschs ed in'abstenziun d'approbar il project e conceder il credit da CHF 880'000 per la sanaziun dils stabiliments dall'Alp Sezner el vischinadi da Vignogn.



7. Sanaziun dalla Via d'uaul La Ritta a Tersnaus el vischinadi da Suraua

a) Approbaziun dil project

b) Concessiun dil credit da CHF 1'800'000

Introducziun

- 1) La Via d'uaul La Ritta resta sil tschancun sco ella ei oz. En cass da misergias d'aua sa cun emprovas vinavon vegnir retratg l'aua ord il butschin.
- 2) Igl uffeci da natira ed ambient (ANU) e l'assicuranza da baghetgs (GVG) han novs project cun butschins d'aua. Tal project vegn per il 2027 relisau, il tschancun da Tschamiu vegn era per realisau el 2027 damai che sclariments necessaris ston aunc vegnir fatgs.
- 3) Las stortas survegnan ina surfatscha da betun, ils mirs dils dutgs vegnan manteni e las preits da grep vegnan schubergiadadas.
- 4) La survesta da cuosts vegn presentada alla radunonza communal. CHF 65'000 vegn buca subvenziunau dil cantun, il cantun separitzipescha cun 68% (CHF 1'200'000) vid il project dalla via d'uaul.





Proposta

Approbar il project e conceder il credit da CHF 1'800'000 per la sanaziun dalla Via La Ritta a Tersnaus el vischinadi da Suraua.

Damondas

Gionin Caduff, Degen ha ina damonda da capientscha. Tgei influenza ha la sanaziun sin la tschaffada d'aua. Daco vegn cheu dil ANU fatg encunter?

Martin Sgier explichescha ch'ella zona da schurmetg S1 ei la via buca lubida. Damai ch'ella ei existenza aschia sa ella restar. Las differentas zonas da schurmetg han era differentas pretensiuns. Dapli informaziuns sa igl uffeci da natira ed ambient dar, ei sa buca vegnir dau dapli sclariment.

Daniel Solèr fa la remarca ch'il stan actual tiel ANU ei, che la via astga restar denton astg'ins buca fa setgei vidlunder. Ei hagi giu liug sesida cugl ANU avon liug.

Casper Arpagaus, Tersnaus gi che la via da Tschamiu vegn pér exequida 2027. La via hagi basegns da manteniments. Cun in auto normal seigi buca pusseivel da carrar sin la via. El fa la proposta da metter tscheu e leu en material ch'in vehichel normal sa carrar senza dons.

Martin Sgier rispunda che sin aschin grond tschancun ston las prioritads vegnir tschentai auter.

Conclus

La radunonza communal decida unanimamein d'approbar il project e conceder il credit da CHF 1'800'000 per la sanaziun dalla Via La Ritta a Tersnaus.

8. Cumpra dall'immobiglia nr. 6-108, parcella 4325 Davos Caplan a Vella

a) Decisiun davart la cumpra

b) Concessiun dil credit da CHF 1'350'000 per mauns dalla votaziun all'urna

Introducziun

- 1) Ils artavels Martin Solèr han l'intenziun da vender l'immobiglia nr. 6-108 e 6-108b parc. 4235 el vischinadi da Vella. Ils artavels e siu executur dil testament, Sigis Rageth han plidentau la vischnaunca schebein igl interess seigi avon maun dad ina cumpra da quell'immobiglia.
- 2) Ils artavels prefereschon da vender alla vischnaunca (maun public) e buca a personas privatas che han l'intenziun da specular. Ei setracta ella casa nr. 6-108 da treis habitaziuns ed el plaunterren las localitads dalla pasternaria, localitads el plantschiu sutterran e la part dallas garaschas el plaunterren egl object niev che s'audan tier la pasternaria, la quala ei a tscheins. La casa 6-108b consista ord duas habitaziuns 5 ½ e 3 ½ (affitadas el mument da Gian Peider Casanova e Rino Demont)
- 3) La cumissiun spaci da habitar e la suprastanza communal ein fatschentai intensivamein cun quella damonda ed ein vegni tier la conclusiun d'acquistar la part veglia dall'immobiglia.
- 4) Il schazetg dallas habitaziuns ella part 6-108 (object vegl), 6-108b (object niev) ein vesiblas el schazetg digl uffeci d'immobiglias dataus dils 20 d'avrel 2018.
- 5) La vischnaunca cumpra la part 6-108 (object vegl, treis habitaziuns e las localitads el plaunterren, localitads el sutterren e garascha) per CHF 1'350'000.
- 6) La vischnaunca desista silla cumpra digl entir object cunquei ch'ei dat in'interessenza concreta da famiglias indigenas cull'intenziun da comprar la part nova digl object (duas habitaziuns).
- 7) La vischnaunca sa cheu acquistar per in prezi fair, spazi da habitar che sa vegnir nezegiaus senza stuer far grondas midadas. Pil futur sto la vischnaunca segiramein preveder da far investiziuns ellas localitads e quei vid las installaziuns, vid il scaldament

ed egl intern dallas habitaziuns. Las investiziuns necessarias san mintgamai vegnir previdas el preventiv communal.

- 8) Plinavon ei el plaunterren la pasternaria en a tscheins. Per aschia era saver garantir quella purschida a liung temps per la vischnaunca discuora cheu persunter che la vischnaunca fa quella cumpra. La pasternaria resta vinavon a tscheins.

- 9) Las unitads dalla proprietad da condomini sepresentan sco suonda;

Object (part veglia) nr. 6-108 (605/1000)

Stizun e pasternaria el plaunterren quota 260/1000

Habitaziun 3 ½ εμπrem'alzada quota 121/1000

Habitaziun 3 ½ secund'alzada quota 119/1000

Habitaziun 4 ½ alzada tetg quota 95/1000

Garascha II nr. 6-108-C quota 10/1000



Consideraziuns

Ils artavels han confirmau ils 10 da mars 2025 d'acceptar l'offerta fatga dalla vischnaunca per la summa da CHF 1'350'000.

Tgei discuora per ina cumpra digl object?

- Mantener vinavon la purschida dalla pasternaria ed ils plazs da lavur.
- Spazi da habitar per famiglias (el mument ein las habitaziuns occupadas).
- L'intenziun dils artavels ei stau da buca surdar ei sco object da speculaziun mobein al maun public.
- Prezi fair sebasond sil schazetg official, dataus digl avrel 2018.
- Igl object nr. 6-108-B (object niev) vegn vendius entras ils artavels a Rino Demont e Remo Caminada.

Discussiun

Primus Cavegn, Vella menziunescha ch'el ei da principi buc encunter la cumpra dall'immobiglia. Denton seigi vegniu presentau buca dil tut correct, sco ch'igl agir en caussa seigi? Tenor Constituziun dalla vischnaunca Lumnezia sto la suprastanza communal esser en 5 per saver decider. Sco ei quei vegniu fatg tier la tractanda presentada? Igl assessur, Ueli Caduff ei vegnius incaricaus dils artavels da vender igl object ed aschia hagi el buca saviu prender ina decisiun e cunterfatg alla constituziun. Daniel Blumenthal sco president dalla Vival hagi en caussa era buca saviu prender ina decisiun. Eventualmein seigi quei ina caussa che la cumissiun da gestiun stoppi ir suenter.

Il president communal, Daniel Solèr explichescha che igl assessur elegius dalla regenza Grischuna hagi l'incumbenza da gest en situaziun nua la suprastanza ei buca completa (pia nua in commember da suprastanza ha da prender stgisa) dad esser presents allas sesidas da suprastanza. Culla presenza digl assessur ei la suprastanza cumpetenta da decider tier las fatschentas ch'in suprastont ha stuiu prender stgisa. El cass dalla decisiun dalla cumpra dall'immobiglia ha la suprastanza sclariu cuagl uffeci da vischnauncas dil cantun Grischun, schebein Daniel Blumenthal sco commember da suprastanza e president dalla Vival sappi far part alla decisiun en suprastanza. Igl ei vegniu fatg tut correct e Daniel Blumenthal ha astgau prender en suprastanza la decisiun, damai ch'el ei buca persunalmein cumpigliaus ha el buca stuiu prender stgisa. Ils mussaments dils sclariments ein avon maun e tier da quellas situaziuns ha ei era decisiuns da dertgiras che confirman igl agir correct dalla suprastanza communal.

Ueli Caduff, Morissen pren il plaid damai ch'el ei vegniu plidentaus. El seigi buca staus involvaus aschia sco ei vegni pretendiu. La decisiun saveva la suprastanza communal prender senza igl assessur, damai che Daniel Blumenthal seigi buca pertuccaus persunalmein e tenor las menziuns dil president communal. Vinavon seigi el mo cusseglader dils artavels, autramein ha el negina funcziun. El sez venda buca l'immobiglia, quei succeda tut sur ils artavels. El fa aunc la remarca, sche tal object va sin fiera, san ins s'imaginar tgei che schabegia lu.

Silvio Capeder, Cumbel damonda tgei che la vischnaunca survegn propi, parcadis?

Il president communal, Daniel Solèr rispunda ch'igl object ei en condomini e la vischnaunca posseda da quei 605/1000 sco presentau ell'introducziun.

Silvio Capeder, Cumbel damonda sco il quen da rendit vesa ora.

Il president communal, Daniel Solèr rispunda che las entradas muntan ad onn CHF 61'500, ed igl object vegn buca cumpraus per fa in grond gudogn. Intschensau il credit da cumpra cun 5% dess ei in tscheins annual da CHF 67'500. Cun quei ei il tscheins versus las entradas pli u meins tuttina.

Curdin Capeder, Cumbel sa ord principi sustener la cumpra digl object, cunzun sch'indigens cumpran la part «nova» dil baghegtg. El fa la proposta ch'ils indigens duein cumprar la part avon che la vischnaunca, buca ch'ei vegni tuttina speculau.

La proposta vegn prida per enconuschientscha e vegn sclarida sco era previda el messadi dalla votaziun all'urna.

Barbara De Giorgi, Vella damonda tgi che paga la renovaziun dalla pasternaria, la cumpra dall'immobiglia per CHF 1.3 milliuns seigi ina cuassa. Con cuosta quei?

Daniel Blumenthal explichescha che la pasternaria ei mo affittadra, cun la cumpra hagi la pasternaria nuot da fa. La Vival Lumnezia ha 2011 surpriu las localitads digl anteriur possessur. Il menaschi da famiglia ha buca giu successurs. La pasternaria ha in'impurtonza gronda ella Val, ella ei in simbol da marca da qualitat e da cuminonza. Ella furnescha paun ed autras spezialitads en differents loghens ell'entira Val. Maschinas che ston vegnir remplazzadas ein grondas investiziun che surpassan las pusseivladads finanzialas dalla Vival Lumnezia. Alla pasternaria eis ei buca pusseivel da comprar l'immobiglia, perquei ei la pasternaria visada vi sin in possessur fideivel. Las proximas generaziuns duein era saver profitar da quei. Las investiziuns muntan a ca. CHF 500'000 che sa vegnir finanziau sez cun sustegn d'autras instituziuns.

Proposta

Conceder il credit da CHF 1'350'000 per la cumpra dall'immobiglia per mauns dalla votaziun all'urna, tenor art. 39 al. d) dalla Constituziun communal Lumnezia.

Conclus

La radunonza communal approbescha il credit da CHF 1'350'000 per mauns dalla votaziun all'urna (gie 124, na 0, abstenziuns 2). La proposta da Curdin Capeder vegn previda ellas discussiuns culs artavels e stipulada el messadi dalla votaziun all'urna.

9. Varia

1) Menziuns dil president communal, Daniel Solèr:

- Decisiun dalla Regenza dils 04 da fevrer. Elegiu assessori per la suprastanza communal ella persuna d'Ueli Caduff
 - Co vein reglau cun Ueli? El fa part mintgamai allas sesidas (tractandas) nua in suprastont sto prender stgisa.
 - Dat ei l'interessenza per ina candidatura en suprastanza lu stat el era a disposiziun per damondas e prenda encunter las candidaturas.
- Organisaziun menaschi tecnic naven digl 01. da schaner 2025
 - Informaziun dallas partiziuns culs novs menaders da team
 - Engaschau Remo Bühler sco niev collaboratur el survetsch tecnic partiziu aua, serenera ed immobiglias.
 - Visada dalla piazza entras Franco Caminada per la fin zercladur 2025.
- Engaschau Celine Deplazes (100%) sco nova collaboratura per la partiziu finanzas (entschatta 01.06.25) e Pia Giger-Alig (60%) sco nova collaboratura ella partiziu administraziun (entschatta 07.04.25).
- Daniel Wolf e Marcel Caduff han visau la piazza per la fin avrel 2025. Ursula Veraguth ha dau giu la piazza per la fin mars 2025.
- Elegiu Sandra Lemos en pensum 80% sco pedela da scola Vella ed adattau il pensum da lavur da Fernando Lemos sin 60% sco pedel da scola Vella e niev 40% el menaschi tecnic partiziu infrastruttura da turissem naven digl 01. da zercladur 2025.
- Rap dalla Greina
- Project «Überleitung» Lumnezia. L'intenziun d'inoltrar il project fin zercladur 2025. Revitalisaziun dallas pardialas (Auen) sco cumpart da compensaziun el project.
- Plan directiv regional; Deponia Porclas. La conferenza dils presidents ha decidu ils 15 d'avrel da prender si la deponia el plan directiv.

- Infrastructura da sport Vella/Bual (pregiudicament digl engrondiment dalla zona, secunda runda d'occurenza da project instradau e terminau).
- Proxims termins radunonzas communalas; 13 da zercladur 2025, 17 d'october 2025 (niev termin), 12 da december 2025.

Ord las retschas da votantas e votants vegn dumandau tgei che vegni fatg ord la casa da scola a Tersnaus e sco ch'ei mondi vinavon cun quei object.

Daniel Solèr informescha che la scol'aula IBW ha giu in'intressenza per ina lavur da diplom e cun quei elaborar tgei pusseivladads ch'ei dess cun quei object. Ei vegn spitgau giu il resultat e silsunter fatg ponderaziuns sco agir vinavon.

Ei vegn buca pli giavischau il plaid ed il president communal, Daniel Solèr siara la radunonza.

El engrazia a convischinas e convischins per la participaziun, pil sustegn e la confidanza demussada enviers la suprastonza communal. Il president engrazia al persunal ed a tut ils gremis e funcziunaris che han collaborau en ina fuorma ni l'autra.

7144 Vella, ils 25 d'avrel 2025

Il president:

L'actuara substituta:

Daniel Solèr

Anina Camenisch